



JABATAN KEMAJUAN ISLAM MALAYSIA

TEKS KHUTBAH

Tajuk :

DIRGAHAYU TUANKU, RAHMAT SELALU

Tarikh Dibaca :

**4 ZULKAEDAH 1443H/
3 JUN 2022M**

Disediakan oleh :

Jabatan Kemajuan Islam Malaysia



جهاز كمالهوان اسلام مليسيا
JABATAN KEMAJUAN ISLAM MALAYSIA

DIRGAHAYU TUANKU, RAHMAT SELALU

4 ZULKAEDAH 1443H / 3 JUN 2022M

اَلْحَمْدُ لِلّٰهِ اَلْقَائِلِ :

﴿ اَعُوْذُ بِاللّٰهِ مِنَ الشَّيْطَانِ الرَّجِيْمِ ﴾

قُلِ اَللّٰهُمَّ مَلِكُ اَلْمُلْكِ تُؤْتِي اَلْمُلْكَ مَنْ تَشَاءُ وَتَنْزِعُ اَلْمُلْكَ مِمَّنْ تَشَاءُ وَتُعِزُّ مَنْ تَشَاءُ وَتُذِلُّ
مَنْ تَشَاءُ بِيَدِكَ اَلْخَيْرُ اِنَّكَ عَلٰى كُلِّ شَيْءٍ قَدِيْرٌ ﴿٦٦﴾
اَشْهَدُ اَنْ لَا اِلٰهَ اِلَّا اللّٰهُ وَحْدَهُ لَا شَرِيْكَ لَهٗ، وَاَشْهَدُ اَنَّ مُحَمَّدًا عَبْدُهٗ وَرَسُوْلُهٗ. اَللّٰهُمَّ صَلِّ وَسَلِّمْ
عَلٰى نَبِيِّنَا مُحَمَّدٍ وَعَلٰى اٰلِهٖ وَصَحْبِهٖ وَمَنْ دَعَا بِدَعْوَتِهٖ اِلٰى يَوْمِ الدِّيْنِ. اَمَّا بَعْدُ، فَيَا عِبَادَ اللّٰهِ، اتَّقُوا
اللّٰهَ، اَوْصِيَكُمْ وَنَفْسِي بِتَقْوٰى اللّٰهِ وَطَاعَتِهٖ لَعَلَّكُمْ تُفْلِحُوْنَ.

SIDANG JEMAAH YANG DIRAHMATI ALLAH,

Marilah kita bertakwa kepada Allah SWT dengan melaksanakan segala perintah-Nya dan menjauhi segala larangan-Nya. Mudah-mudahan kehidupan kita sentiasa dinaungi rahmat dan kasih sayang Allah SWT di dunia dan di akhirat. Bersempena dengan **Hari Keputeraan Kebawah Duli Yang Maha Mulia Seri Paduka Baginda Yang di-Pertuan Agong Al-Sultan Abdullah Ri'ayatuddin Al-Mustafa Billah Shah Ibni Almarhum Sultan Haji Ahmad Shah Al-Musta'in Billah**, khutbah pada hari ini akan membicarakan tajuk: **"Dirgahayu Tuanku, Rahmat Selalu"**.

SIDANG JEMAAH YANG DIRAHMATI ALLAH,

Alhamdulillah, dalam sistem pemerintahan Raja Berperlembagaan yang diamalkan di negara kita, raja diletakkan pada kedudukan yang paling tinggi dan memiliki fungsi yang bukan sahaja untuk melindungi agama dan negara, tetapi juga menjadi lambang perpaduan dan kesejahteraan seluruh masyarakat.

Sesungguhnya sultan, raja atau khalifah ialah penyambung dan pewaris kepada tugas kenabian untuk menjaga agama dan mentadbir negara. Perkataan '*sultan*' berasal daripada perkataan Arab, diulang beberapa kali dalam al-Quran seperti dalam ayat 151 Surah Ali Imran, ayat 153 Surah al-Nisa, ayat 96 Surah Hud, ayat 40, Surah Yusuf, ayat 22 Surah Ibrahim, ayat 42 Surah al-Hijr, dan ayat 33 Surah al-Isra'. Selain daripada kalimah '*sultan*', Al-Quran menggunakan perkataan-perkataan lain seperti '*Ulil Amri*' atau '*Amir*' dan '*Malik*' yang merujuk jawatan pihak berkuasa dalam sesebuah pemerintahan atau kerajaan.

Di negara yang tercinta ini, mengikut Perkara 32 (1) Perlembagaan Persekutuan, Ke Bawah Duli yang Maha Mulia Seri Paduka Baginda Yang di-Pertuan Agong adalah ketua Negara. Sebagai ketua negara, Seri Paduka Baginda Yang di-Pertuan Agong merupakan ketua tertinggi persekutuan yang melaksanakan urusan kerajaan terutamanya menaungi rakyat dengan keadilan dan keprihatinan.

SIDANG JEMAAH YANG DIRAHMATI ALLAH,

Sejarah negara kita melakarkan, kedatangan Islam di Alam Melayu sejak abad ke-13, telah membolehkan Islam berkembang melalui perdagangan, penaklukan dan perkahwinan sehingga Islam menjadi akidah dan cara hidup kerajaan dan masyarakat Melayu setempat. Dengan rahmat Ilahi, raja-raja di Alam Melayu memilih Islam sebagai agama anutan.

Berdasarkan semangat ketaatan dan kesetiaan orang Melayu kepada raja; lebih utama dipengaruhi oleh keyakinan dan kepercayaan Orang Melayu terhadap kepimpinan raja, apabila Sultan Melaka pertama, Raja Iskandar Shah, menganut Islam pada tahun 1414 Masihi, rakyat berduyun-duyun mengikuti baginda.

Iniilah kesannya apabila Sultan atau Ketua telah beriman dan bertakwa, maka seluruh wilayah akan mengikutinya. Fudhayl bin 'Iyadh pernah berkata: *"Seandainya aku mempunyai doa yang mustajab, nescaya akan aku panjatkan doa untuk pemerintah"*. Demikianlah besarnya pengaruh dan peranan Sultan kepada perkembangan dakwah Islam.

Rasulullah SAW juga menggalakkan untuk kita saling mendoakan antara satu sama lain sebagaimana sabda Nabi SAW:

يُصَلُّونَ عَلَيْكُمْ وَتُصَلُّونَ عَلَيْهِمْ

Maksudnya: *"Mereka (para pemerintah) mendoakan (kebaikan) untuk kamu, dan kamu mendoakan (kebaikan) untuk mereka"*.

(Hadis riwayat Imam Muslim)

SIDANG JEMAAH YANG DIRAHMATI ALLAH,

Terdapat satu kitab berjudul *al-Ahkam al-Sultaniyah* karangan Imam al-Mawardi membahaskan tentang tanggungjawab seseorang pemerintah, paling utama ialah:

حِرَاسَةُ الدِّينِ وَسِيَاسَةِ الدُّنْيَا

"Menjaga agama dan mengurus tadbir urusan dunia"

Dalam Islam, pemimpin yang adil itu disebut sebagai salah satu dari golongan yang doanya tidak ditolak oleh Allah SWT sebagaimana sabda Nabi Muhammad SAW:

ثَلَاثَةٌ لَا تُرَدُّ دَعْوَتُهُمْ: الْإِمَامُ الْعَادِلُ

Maksudnya: *“Tiga golongan yang tidak akan ditolak (oleh Allah SWT) doa mereka (antaranya): ialah pemimpin yang adil”.*

(Hadis riwayat Imam al-Bukhari)

Maka dalam hal ini, Rasulullah SAW yang juga merupakan ketua negara menjadi suri teladan yang paling baik untuk dicontohi oleh mana-mana pemimpin selaras dengan firman Allah SWT dalam Surah al-Ahzab ayat 21:

لَقَدْ كَانَ لَكُمْ فِي رَسُولِ اللَّهِ أُسْوَةٌ حَسَنَةٌ لِّمَن كَانَ يَرْجُوا اللَّهَ وَالْيَوْمَ الْآخِرَ وَذَكَرَ اللَّهَ كَثِيرًا

Maksudnya: *“Demi sesungguhnya, adalah bagi kamu pada diri Rasulullah itu contoh ikutan yang baik, iaitu bagi orang yang sentiasa mengharap (keredhaan) Allah dan (balasan baik) hari akhirat, serta dia pula menyebut dan mengingati Allah banyak-banyak (pada masa susah dan senang)”.*

SIDANG JEMAAH YANG DIRAHMATI ALLAH,

Alhamdulillah kita dikurniakan seorang sultan berjiwa rakyat, yang menyempurnakan amanah pemerintahan dengan sifat-sifat insani, dan berusaha memastikan keamanan dan kesejahteraan rakyat diutamakan dalam apa-apa jua situasi. Semoga kebijaksanaan pimpinan seorang Sultan, akan diperkukuhkan dengan nasihat barisan ulama yang tegas dan barisan *umara* yang ikhlas, akan didukung dengan ketaatsetiaan rakyat yang hidup harmoni, dan lebih utama akan dilimpahi cahaya petunjuk Ilahi.

Kita juga telah melihat kebijaksanaan Seri Paduka Baginda Yang di-Pertuan Agong dan Raja-Raja Melayu yang mengambil beberapa

keputusan bijak menstabilkan negara dalam menghadapi pasang surut cuaca politik negara dan cabaran ketika negara menghadapi pandemik. Syukur kepada Allah SWT, institusi di-Raja telah memayungi kita dengan keadilan dan kebijaksanaan dalam memastikan keamanan, dapat dinikmati oleh seluruh rakyat. Maka sewajarnya kita menumpahkan seluruh ketaatan dan kesetiaan sesuai dengan prinsip asas Rukun Negara yang telah kita lafazkan sebagai warganegara.

Dirgahayu Tuanku! Semoga Ke Bawah DYMM Seri Paduka Baginda Yang di-Pertuan Agong sentiasa diberi kesihatan, kesejahteraan, dan kekuatan dalam mentadbir negara. Doa kami rakyat jelata juga supaya Ke Bawah DYMM Seri Paduka Baginda Yang di-Pertuan Agong sentiasa berada dalam rahmat, keberkatan dan bimbingan Allah SWT jua dalam usaha memayungi seluruh rakyat di bawah teduhnya rasa aman dan sentosa di negara yang tercinta ini.

Mengakhiri khutbah pada hari yang mulia ini, khatib ingin meninggalkan para Jemaah dengan beberapa pesanan:

Pertama: Jadilah hamba Allah SWT yang taat pada pemerintah dalam perkara yang makruf sebagaimana yang diperintahkan dalam Islam.

Kedua: Hubungan baik dan erat dengan pemerintah perlu diteruskan dengan masing-masing saling mendoakan sesuai dengan tuntutan agama.

Ketiga: Sebagai rakyat yang bertanggungjawab, kita wajib menjauhkan diri dari segala perbuatan jahat dan sangkaan buruk terhadap pemerintah dan sesama masyarakat, yang boleh membawa kepada keadaan huru-hara atau tidak aman dalam negara.

Firman Allah SWT dalam Surah al-Nisaa ayat 59:

يَا أَيُّهَا الَّذِينَ ءَامَنُوا أَطِيعُوا اللَّهَ وَأَطِيعُوا الرَّسُولَ وَأُولِيَ الْأَمْرِ مِنْكُمْ فَإِنْ تَنَزَعْتُمْ فِي شَيْءٍ فَرُدُّوهُ إِلَى اللَّهِ وَالرَّسُولِ إِنْ كُنْتُمْ تُؤْمِنُونَ بِاللَّهِ وَالْيَوْمِ الْآخِرِ ذَلِكَ خَيْرٌ وَأَحْسَنُ تَأْوِيلًا ﴿٥٩﴾

Maksudnya: *“Wahai orang-orang yang beriman, taatlah kamu kepada Allah dan taatlah kamu kepada Rasulullah dan kepada "Ulil-Amri" (orang-orang yang berkuasa) dari kalangan kamu. Kemudian jika kamu berbantah-bantah (berselisihan) dalam sesuatu perkara, maka hendaklah kamu mengembalikannya kepada (Kitab) Allah (Al-Quran) dan (Sunnah) Rasul-Nya - jika kamu benar beriman kepada Allah dan hari akhirat. Yang demikian adalah lebih baik (bagi kamu), dan lebih elok pula kesudahannya”.*

بَارَكَ اللَّهُ لِي وَلَكُمْ بِالْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ، فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.



خطبة كدوا بولن جون

2022M/ 1443H

الْحَمْدُ لِلَّهِ عَلَى آلَائِهِ وَإِحْسَانِهِ، وَالشُّكْرُ لَهُ عَلَى تَوْفِيقِهِ وَامْتِنَانِهِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعَظِيمًا لِسَانِهِ، وَأَشْهَدُ أَنَّ مُحَمَّدًا عَبْدُهُ
وَرَسُولُهُ دَاعِيًا إِلَى رِضْوَانِهِ.
صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزِنَةَ عَرْشِهِ وَمِدَادَ كَلِمَاتِهِ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ وَمَرْضَاتِهِ،
ثُمَّ اْعْلَمُوا أَنَّ اللَّهَ سُبْحَانَهُ وَتَعَالَى أَمْرُكَ بِأَمْرٍ بَدَأَ فِيهِ بِنَفْسِهِ؛ فَقَالَ - عَلِيمًا حَكِيمًا:
إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا ﴿٥٦﴾
[الأحزاب: 56]

اللَّهُمَّ صَلِّ وَسَلَّم عَلَى عَبْدِكَ وَرَسُولِكَ مُحَمَّدٍ نَبِيِّ الْبَشَرِ النَّذِيرِ، وَالسَّرَاجِ الْمُنِيرِ،
وَارْضَ اللَّهُمَّ عَنْ آلِهِ وَصَحَابَتِهِ أَجْمَعِينَ، وَعَنْ التَّابِعِينَ، وَمَنْ تَبِعَهُمْ بِإِحْسَانٍ إِلَى
يَوْمِ الدِّينِ، وَعَنَّا مَعَهُمْ بِعَفْوِكَ وَكَرَمِكَ وَإِحْسَانِكَ يَا أَرْحَمَ الرَّاحِمِينَ.
اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ،
اللَّهُمَّ آمِنَّا فِي أَوْطَانِنَا، وَأَصْلِحْ وَاحْفَظْ أَيْمَتَنَا وَعُلَمَاءَنَا وَوُزَرَائِنَا وَوُلَاةَ أُمُورِنَا.
اللَّهُمَّ وَفِّقْهُمْ لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ اجْعَلْهُمْ هُدَاةً مُهْتَدِينَ
صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيقِكَ عَلَى صَاحِبِ الْجَلَالَةِ،

Kebawah Duli Yang Maha Mulia Seri Paduka Baginda Yang di-Pertuan
Agong, Al-Sultan Abdullah Ri'ayatuddin Al-Mustafa Billah Shah Ibni
Almarhum Sultan Haji Ahmad Shah Al-Musta'in Billah dan Kebawah Duli
Yang Maha Mulia Seri Paduka Baginda Raja Permaisuri Agong, Tunku
Hajah Azizah Aminah Maimunah Iskandariah Binti Almarhum Al-
Mutawakkil Alallah Sultan Iskandar Al-Haj;

وَكَذَلِكَ صَاحِبِ الْفَخَامَةِ،

Tuan Yang Terutama, Tun Dato' Seri Utama Ahmad Fuzi Bin Haji Abdul Razak, Yang di-Pertua Negeri Pulau Pinang.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْغَلَاءَ وَالرِّيَاءَ، وَالرَّبَا وَالزَّنَا وَالزَّلَازِلَ وَالْمِحْنَ وَسُوءَ الْفِتَنِ مَا ظَهَرَ مِنْهَا وَمَا بَطَنَ عَنْ بَلَدِنَا هَذَا خَاصَّةً، وَعَنْ سَائِرِ بِلَادِ الْمُسْلِمِينَ عَامَّةً يَا رَبَّ الْعَالَمِينَ.

Sidang Jemaah Yang Dirahmati Allah,

Khatib juga mengambil kesempatan ini untuk memaklumkan berkenaan Penyakit Tangan, Kaki dan Mulut atau lebih dikenali sebagai HFMD (*Hand, Foot and Mouth Disease*). Sehingga 28 Mei 2022, jumlah kumulatif kes HFMD yang dilaporkan di Negeri Pulau Pinang adalah sebanyak 3,012 kes berbanding dengan hanya 144 kes pada tempoh yang sama tahun 2021, peningkatan sebanyak 20 kali ganda. Sehingga tempoh yang sama, sebanyak 102 wabak HFMD telah dilaporkan dengan 2,744 kes bersamaan 91.1% adalah dalam kalangan kanak-kanak berumur di bawah 6 tahun.

Memandangkan tiada rawatan khusus bagi penyakit ini, khatib ingin menyeru para jemaah sekalian agar mengambil langkah pencegahan seperti sentiasa membasuh tangan dengan sabun dan air bersih, mengamalkan etika batuk (tutup mulut dan hidung semasa batuk dan bersin) serta elakkan dari berkongsi barangan peribadi. Kita juga perlu memastikan persekitaran rumah, pusat penjagaan kanak-kanak, sekolah dan taman permainan kekal bersih. Sekiranya ada tanda jangkitan pada kanak-kanak, segera dapatkan rawatan di premis kesihatan yang terdekat. Sesungguhnya, **mencegah lebih baik dari merawat**. Semoga usaha ini menjadi asbab agar Allah **سُبْحَانَهُ وَتَعَالَى** melindungi kita dari jangkitan wabak selain terus melazimi doa:

اللَّهُمَّ إِنَّا نَعُوذُ بِكَ مِنَ الْبَرَصِ وَالْجُنُونِ وَالْجُدَامِ وَمِنْ سَيِّئِ الْأَسْقَامِ، يَا أَرْحَمَ الرَّاحِمِينَ.

Ya Allah! Dengan sifat-Mu yang Maha Pemurah dan Maha Mendengar, jadikanlah kami dan keturunan kami orang-orang yang istiqamah mendirikan solat secara berjemaah serta mengeluarkan zakat dan melaksanakan waqaf.

Ya Allah! Berilah petunjuk-Mu kepada kami, pemuda-pemuda kami, pemimpin-pemimpin kami untuk memberikan khidmat bakti yang terbaik kepada agama, bangsa dan negara.

Ya Allah! Kau hindarilah kami daripada perbuatan-perbuatan khianat dan durjana yang merosakkan kepentingan agama, masyarakat dan negara.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.
عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَنِ وَإِيتَايَ ذِي الْقُرْبَى وَيَنْهَى عَنِ الْفَحْشَاءِ وَالْمُنْكَرِ
وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿٥٠﴾
فَاذْكُرُوا اللَّهَ الْجَلِيلَ يَذْكُرْكُمْ، وَاشْكُرُوا عَلَى نِعَمِهِ يَزِدْكُمْ، وَلَذِكْرُ اللَّهِ أَكْبَرُ وَاللَّهُ يَعْلَمُ
مَا تَصْنَعُونَ ﴿٥١﴾